

ভিক্ষা দেনে এরে আহিগিতৌ



ধনঞ্জয় রাজকুমার

ভিক্ষা দেনে এৰে আহিগিতৌ

ধনঞ্জয় ৰাজকুমাৰ

আসাম পাৰিষাদ
শিলচৰ

লেখকৰ আৰ আৰ লৈৱিক

ৰুবাইয়ৎ-ই-ওমৰ খৈয়াম
ডিগল আতহানল মোৰে
মিকুপৰ চেৰি ফুল
হপনৰ বাবুয়ানি
কিমে অয়া আছৎ ইকাইতাপি
লক্ষ্মী গিথানক (নাটক)

ব্ৰজেন্দ্ৰকুমাৰ সিংহৰ লৈৱিক

চক্ৰবৰ্দ্ধি
লেহাও ফুলগৰে
এলাৰ খুৎতল
ধ্ৰুৱপদ
মেৱাক সেৱাক
কঠগিৰো
পুংলল
মেইকেই
বিৱহী যক্ষৰ এলাহান
জিনজিনি
পৌৱেই (যুগ্ম সম্পাঃ)
মেয়েক মেঠেল ১ম ভাগ
ৰসবিলাস
চিকংলেই
সিকাডেইনি

ed. Bishnupriya Manipuri Language & Literature

ভূমিকা

লেৱিক এহানৰ কবিতা এতা ত্ৰিপুৰা চে ব সম্পাদক শ্ৰী সমৰজিৎ সিংহ পেয়া ইকৰেছুতা । শ্ৰীনীলকান্ত সিংহ বাৰ ড: অশোক সিনহাৰ পাং নিকুলিল । কবি দিল্‌ লক্ষীন্দ্র সিংহই লেৱিকহান লেহে মোৰে উৎস পাংকাল দেৱ কৃতজ্ঞতা প্ৰকাশ কৰিয়া ঔতা ঋণ হুজানি নাইতই ।

গীতা মুখাৰ্জি, সুশীল কুমাৰ সিংহ, পৰীক্ষা নিয়ামক, নাগাল্যান্ড, অধ্যক্ষ মহে সিংহ, অধ্যক্ষ হেমকান্তি সিংহ, অভিনেতা নিশিকান্ত সিংহ, শ্ৰীমতী অ সিংহ, কবি ভক্ত সিং গাছিব নাঙ তঙাল কৰে মাতানি থক । কিয়া লেৱিকহান লেহে তানুৰ সহায়তা পেয়া আহুৰিগ । পৰিমল সিংহই প্ৰফ জিতেন্দ্ৰ নাথে প্ৰেসৰ কামে আটিয়া হিনপেইল । কল্যাণীয়া জ্যোতিৰ্ময় সি মণিদিপা সিংহ প্ৰেসৰ কামল গইগ অছিলু ঔবাকা নিয়াম হিনপেইলা । শ্ৰেহাশিস দিযৌৰি ।

◌বিমলৰে লেৱিক এহান দেখুয়া নুয়াৰলু দু:খ এহান এজনমে না ককইতই

মোৰ প্ৰধান পাঠকগি ◌দিলীপ কুমাৰ সিংহ, ◌উত্তম কুমাৰ সিংহ
◌অধ্যক্ষ প্ৰসন্ন কুমাৰ সিংহ এপেই নেই । কাৰকাতে ইকৰলু ?

জয়া কম্পুটাৰ সেন্টাৰৰ বন্ধুবৰ দিলীপ ধৰ গিৰকৰ সাহায্য ঔতাৰকা ধনাবা উপযুক্ত ভাষা বিসাৰেয়া নাপাউৰি ।

আসাম পাৱিৰ্শাৰ্শৰ কৰ্ণধাৰ হাজি নুৰুল লস্কৰ গিৰকৰ বিষ্ণুপ্ৰিয়া মণিপুৰী ভাষা প্ৰশংসা কৰৌৰি । ব্যবসা বুদ্ধিৰ প্ৰমাণতে না পেইলু ।

সূচীপত্র

অটগরে ৭

খুৎতল ৮ নুয়া করে অকরিক ৮ নুংকুপিগ ৯

নিরন্তর ৯ মাতানি নাইল ১০

বানার ছেয়াগ ১০

কনার বৌহান ১১ পথগ ১১

মাচুহান ১২ এপেই আছিল ১২ আরাক খানি ১৩

মাতিং বুলনুতাই আহান ১৪

দ্বিয়বেদে ১৪ হাই বুলেদে ১৫ রঙ ১৫

হোলি ১৬ মাতেদে ১৬ পাশা খেলা ১৭

চরণ আহান ১৮ উপমা ১৮

এহান কিহান ১৯

ঠাইগ দিয়া ২০ থঙ আহানর তলে জোনাক ২০

বিবুলাগ অউরি ২১

বাতি এহান ২২ চতুর্থ শান্তি ২২ পাগালা মিঙালে ২৩

আহির পানি সিটা ২৪ মুঙেদে হবা দিন আহিতই ২৪ দুঃখ পাছে ২৫

তুমি থাই ২৬ দুঃখরে আর ২৬

খানিক করে ইমপানি অ ২৭

বানা আহান ২৮ পলাঙগ ২৮

হপনহান ২৯

আকতা তোরে ২৯

নাপাউরি ৩০ সাঙ নাছি ৩০

কবি ল্যাংসটন হিউজরে ৩১

হমাজি গাটর পানি ৩২

অটগরে

কথাহান না কাড়লই অটগ,
ডেঙপালর মাতাম ফাছে বুকগৎ কানহান দিয়া হুন
লাৎকরেছি হারৌপিয়মর ঠইগর ডুকডুকানিহান ।
মাদানহানর গারিগৎ ইকরে দিং না থুঙছে আশাহা
খানি খামকরে দেই,
অকরাহানতে কই ! অকরাহান নায়া খামকরাহান
মন এহান খানি আহান দঢ়া করতা ।
আধারহানবে বেড়েয়া কায়া যিতইগ মাযার মঞ্জুরী
চেয়া আইকগা
আর লাল নাইকগা ।
পথগর গজে জঙিয়া পড়েছিল যারিহানল আইকগ
কথাহান না কাড়লই অটগ, আহিগ, নিংশাহান ।
এবাকা শাতক মালতী
খানিক করে আল তি ।
আশাহান থুৎতাঙে করিয়া বাসাছি নুয়ারা পানি ।
খানিক করে লাগেই থংমেইহান ।
কাদাৎ বয়া আছে নেইহান ।
কইতে উমহান,
তিতাহান না ঠুমহান ।
গর দুয়ার নেই বানাহান
কিহানতে কানাহান ।
নুংশিহান,
তোরতাউ আর নেই উনি পুনচিহান ।

কিতার অকরা কিতার খামকরা হারনাপেয়া থাইলা
কথাহান থায়াও কিতা, অর্থ দেকুরাগতে কই !
হমবুকুর ওতা হাবি খট্টিপু পুরাণ ।
মাতানি মনাউরি বুললেতে মাতেহে বেলেইং ।
ভাবক নেই, থৌপু নেই, দহিনা নেই ।
কিতাউ মাৎতু, কাবেরু মাৎতু !
ওতাউ মাতে বেলেইং,
কথাহানতে না কাড়লই বেনাই অটগ ।

খুৎতল

খুৎতল আহান দিলে মোরে কানা উটু আগ,
আর না রহের দূরেইর মন্দিরগি ।
জনম এহান বেতালেদে ঠই হাতোগি অইলা
লককরিয়া ককগ বুজে ছালাহানি থইলা ।
কনাকত মি পাছু এরে নিঙ এহান না মুকের,
বিয়ান মাদান পারসহানি হকের ।
দুয়ারহানৌ গাটেছি কুংগদে,
হমাজি তি আরবেদে নাই এবারাদে অদে ।
খানিপপারা বানা দিলে এংতা পারা দিতৌ
মুষ্টি আহান তিক্কা দেনে এরে আহিগিতৌ ।
জাঙর তলে পথগ দিলে যিতৌগা তোর গরে,
চিকইতৌগা বেলিটিকর পরে ।
তোর নাংহান খানি নিংসিং করনে
ঠই হাতোগি বাদানিরকা মায়া আকনান দরনে ।

নুয়া করে অকরিক

হাগহানর ফুতিচুটিগৎত কেলয়া পড়িল খানিপপারা মিঙাল,
লেইরাপা প্রকৃতির মুঙহানাৎ বাত কুপাঙহানর সাদে । কামনার অটগিৎ ইসেঙ
সেঙ পানি খুচেই আহান । আহ ! মিটাদে খৌরাঙহান করুণাময়ী । চুলর
তলাহানাৎত জন্মান্তরর নুংশি সুবাস আহান আহক এরে তেক তেক করের
মিকুপ এতাৎ । কিতা বুলেছিলে ফিয়মগ, মাত আরাক আকখুকম আমারে ।
আমার লেয়ছে হাহাকার এতার, না গুরেছি ভক টাটির আসনহান নেই ।
টেহপাঙহানর আহিগি, চৈত্র সংক্রান্তির লেপেছি ফামহান, রইদে পুড়েছে
মদ্রহান, গছপুরনা অছে চারিয়বারার শূন্যতাহান, আকগয়ো আমারে
বিসারেয়া নাপেইতার। আমি হকরেছি লুক এহান আগই যাকরে দেক,
আকখুকম সেকোদেক ছিতারেয়া পড়ানির আগে । আমার মাটিয়কপা
কাংকরানি এহানরকা থদেক পারা তিনহানর ফাম ।

থাবাল থামাম, সেঙনিরকা থছি লুয়াগ, বেলিটিকর পংথাজারে
বহেছে পাহিয়াগর মামছে রৌহান - আমারে আদিম কালাচিংখেইহান আলথক
করে দেই । আছিল ঔহান আমি মাংকরে বেলাছি ।

নুংকুপিগ

নুংকুপিগ যা এহানাৎ কনাকত যককরলু,
উগর বেদে অয়া মিতে কি লইলাটে পড়লু ।
জাঙে দিলু হনার নূপুর কাঠি সুরি গারগৎ,
তামফা আগ পিদা দিলু বরন ডাছিল নারগৎ ।
তারে মিতে নাউ চিনেছু, তাউ নাচিনে মোরে
মি দুয়াদে বুললু, বার, তা আছিলতাই গরে ।
উনা নাছি দিন আহানো, তানাপনা নেইতা,
তার নারগই মোর এগইতে কতি আছে খেইতা ।
উতাউ হাদিং দিয়গিয়ে খেলা খেলা থায়ার,
বরন আহান সকনিরকা কাদাং খানি আয়ার ।
তারে মিতে মাচাক দেউরি, তাউ আকেইদিন দেৱগা,
তার কাদানি ডালে দিয়া মোর কাদানি নেৱগা ।
এইরাহানাৎ আয়া খেঙর আহির পানির টউগ,
নুংকুপিগ বাহের উপেই, হকগ অরতা নউগ ।

নিরন্তর

নিরন্তর আছে হাবি য়ারি,
বরনে তিঙের ফুল জারি ।
পার নেই পানিহান অনন্তর আধারে বুরিল
টুমছেগা হাগ এহানর নীল ।
মামে বাহেছেগা এরে হপনর মড়া এগ কার
কতিয়ো দূরেই আছে এপার হৌপার ।
হে আধার আহিথম ! হে দ্বিগি পিচুম !
তুমি পাহরেছো হাবি জনমর উম ।
গারিগৎ
নিংসাহান আছেতা কতিও মত,
জঙেছে মেয়েক হাবি অটগর
আমার এ য়ারিহানো নাছেতা অমর ।

মাতানি নাইল

মাতানি নাইল এ জনমে মাতিং বুললু কথাহানি,
বিসারাউরি নারগ খানি ।

দেহুতা কুরাং আছে, লপুকগৎ না পথে গাটে
লাহলে আটে আটে ।

দেহানি নাইল এ জনমে তোঁর শাতহান এ আধারে ।

মামছে এ আহিদিগি বিসাররতা বাঁরে বাঁরে

আধার ডালে,

আহির পানি ডালে ডালে ।

সকনি নাইলে এ জনমে আঙুলিগি মোরকা থছৎ ।

কুং গাঙে তি কুরাং বহৎ

মোর সালেদে এদিন হাবি তি বাসেয়া

যানা নারলু পথ নাপেয়া ।

মাতানি নাইল, দেহানি নাইল, ঠই এগল চানা নাইল,

ইঙো নাইল জনমহানল হার নাপাছু কিয়া থাইল ।

বানার ছেয়াগ

বানার ছেয়াগ ! তোঁর ইঙে জিরাক খৌরাঙ এহান । তার খৌনুগ
বুজে ডালে দিছ বিরহ ফুলর রঙ । দিন এহানর আতহানাং দিলু খঞ্জনীগ । ঔগর
তালহানাং বাহিয়া থাইতই ইমপানি আহান ।

হাগ এহানাং গায়া আছৎ নিরুপায় পৌহান । ঠইগইতে হারপাছে
থাং গোধূলিৎ তিলছেগা আহির পানির ধারাগর মাতেঁহান !

মি নাযেইতৌগা কুমেই চানাং, মি নাচেইতৌগা খেয়য়া আছে
নুংশিহান ।

খানি নেগা, খানি মোরকা থদিছ । মিতে উদারি বাদারি করিয়া
চলুরি মানুগ । নিংশিং নাউরি কুনদিন চাহামহান বুজে বানাহান পাছুতা ।
খৌরাঙহানরে হিস দূর করলা হাবিয়ে । আজি খানি জিরাক । মি আলথক
অইতে ডাহিয়া নিতৌগা ঠুঁকরানিহান ।

কনার বৌহান

ছেয়া এগ জনম এহান পিঠিৎ অয়া বুকগ ছকর,
কিগ থকর !

কনার বৌহান এলা দেবতা পারাহানাৎ
উহান চানাৎ

আখার মিঙাল নিককা লেহে আইতারাতা,
থাইতারাতা

আত দরিয়া পুয়াল সুরির সাদে ডিগল আহান পারেঙ,
অইতারা লেঙ ।

মাতে নারলু আছুতা না নেইতা মিভে
এইগি দিতে ।

কুংগ মাপু, কুংগ মিনাই !

আজি তি নাই

পারে দিতেই দশর মুঙে রাঙা ফিটা,
এপেই ভিটা ।

গিরিতে নেই, গুমে আছি চনচরাগি
মি পারাগি ।

উনা অংগা বুলেছিলু, নাদলে যানা ।

কিহান কানা !

লেইরাপা এ আহি দ্বগি কিতা করত মাতে দেনে
খানি কেনে ।

কনার বৌহান কুরাং থাইলতা ।

আরতে নাইলতা

দুয়ারহানাৎ,

মোরে চানাৎ

পথগ

পথগরে ফুলডাল পিদাদেই,

পথ এগর গৰ্ভৎত আমি হাবি জবম অছিলাত ।

মাচুহান

হারৌহানর কিহান থইলে, যারৌহানর তাতে,
কিহান তিতে থ দিলেতা নুংশিহানর কাতে !
জনম এহান খৌরাঙ আহান খানি অইলৌ থারতা,
হিলর তলে গাতেইলেগাউ খেঙগ অয়া চারতা ।
থরুয়াগ পেয়া কাছে নাপুর ফানেক হানে,
ঠই হাতোগির কি মাচুহান এবাকাউ নাউ জানে ।

আহি দ্বগির পানিহানাং হাতুরলে তি আয়া
হনা রঙহান অলরতানাই হুদি এগং থায়া ।
আধারহানে পাহিয়াগর সাদে ফরদেছিলতা,
তোরাং যানার মিকুপ এহান এমাটিকৌ ঠিলতা ।
কি খঙরৌ পাহিয়াগ, কি জমরগ তিতে,
লনা নাকররতা কিয়া এতা হাবি দিতে !
হারৌহানর শাতহান খেইলে, যারৌহানর তাউ নাই,
বাছেয়া তি আছংতাক হনার মাচুর কাউ নাই ।

এপেই আছিল

এপেই আছিলতা লিসিং লিসিং আন্দিয়া, বাহিয়া গেলগ
দূরেইং । কাড়গই বিদাছে অসহায় নারগ । আঙুলিগিৎত জঙের বিষ
ধারাহান । আহির পানির চূড়াগং জঙিয়া পড়ের জন্মান্তরর পাহুরেছি ঋতুহান
মতছে সাজহান ।

শব্দ সমুদ্রর পায়গং কানহান নাহনের আগই ভিক্ষা মাগের
আলথক অয়া গেছেগা কাড়গ । নীলুয়া আঙেইহান কারিয়া হাগ এহা
রইদহানাং বাসেয়া আছে ।

গরচেরৌ দুগ, গেরুয়া প্রকৃতিহান, অসহায় লাম আহান, চা
এলকরানি আহান, নিং আহান, নিংসিং আহান, পাহুরানি আহান ধুলি
কগার সাদে বাহের ।

আরাক খানি

আরাক খানি দুঃখ দিতেই বুলেছিলে ঠইগ,

মাততা মোরে খানিক করে তিয়ে মিয়ে কইগ ।

হাদিৎ আছে পথ এগরে

যাউরিগা মি দরে দরে,

টেকাগরমা আছে নৌগ ছেয়া বিসারেয়া

কুরাং আছং, তারৌ খানি জনম আহান দেয়া ।

মুষ্টি আহান বেলির মিঙাল হিচে দিলে, কইতে ?

মেঘলা হাগে ছেয়ায় বৌয়ে গইগ খানি অইতে

সেলপুঙ আহান দূরেইং কাদের

পাহুরানি সুপৌ নাদের ।

অকলাক আহান চারিবেদে হক চেলয়া আছে,

বিয়ান মাদান কাদাং থায়াও পানাহানতে নাছে ।

লিকছংক হুনাগিরক, হু দিলেতাউ কগগ,

নুংশিহানাং বুয়েয়া তি মুজুরলেতা মনগ ।

গেটি আকপেই, খেলা আকপেই,

দ্বগি দূরেইং, অছিতা খেই,

হাদিৎ আছে দুঃখহানে সামকরিয়া থরতা,

কিসাদেতে খেইকরানি তোরতা বার মোরতা ।

কার উরে মি থাইতু আজি, কার থকে মি চড়তু !

এপারে না হৌপারে তোর ফুতি চুটিং দরতু !

মুঙে, না তি পিঠিং আছং !

মোরাংত তি কিহান পাছং !

মারুপগ না য়েকনাপাগ কিসাদে হারপানি ।

বানাপেয়া দুঃখ দিয়র উহান কি গই জানি !

মাতিং বুললুতাই আহান

মাতিং বুললুতাই আহান মাতলুতাই আরাক আহান ।
তোর মুঙে আহিমতাই হাবি পাহরৌরি ।
পাহরৌরি তোর গালগং তিলগ আছে না নেই ।
তোর আহির পানি নাপু না ফুল রঙ ।
তিল ফুলগ কিতার উপমা ।
দিং বুললুতাই আহান, আনেছুতাই আরাক আহান ।
তোরে নিংসিং অইলে হাবিতা পাহরৌরি ।
হিনাছং পানি ঔতার কণা কতগ তোরাংত
জঙানি নাকরিয়া নাপয়া আছে ।
ঔগদে চেইতে বিবুলা অইলু ।
মাগতৌ বুললুতাই আহান মাগলুতাই আরাক আহান ।
তোরে চেয়া পাহরলু কিতা নেনাং আহেছিলুতা ।
তি দিলে দূরেইর পথ ঔগই জনম এহানরে বেড়েয়া কাদের ।
তি বানাহান দেনারকা তুললে আত ঔহানাংত
য়াহান পাতিয়া পেইলু দুঃখ এহান
কতিয়ো ঠুমছেতা !

দ্বিয়বেদে

এপেই মেঘলা হৌপেই বরন
হাদিহানাং খরা ।
এপেই আধার হৌপেই ফলাল
পথগতে তিনজরা ॥
প্রেমে হমাং কুরাং আছং
পুংলল নেই ডাকগ ।
তাংখাহানাং কাদন আহান
রাহে রাহে থাকক ॥
এপেয়ো মাম হৌপেয়ো মাম
নাদেখলু মেইথঙ ।
মোর এবেদে অয়া চেইলু
তোর উবেদে অঙ ॥

হাই বুলেদে

কবী

রূপা খানি পেইলে মিতে বিদেশ থকইং,
তোরে সর্কইং,
বকচা এহান আই তুলেদে,
তোর দ্বি আতে
ঠইগ বুজে হাতে হাতে ॥

রূপা খানি পেইলে মিতে থাকে লেহাওর নুংশি গতে
পথে পথে
আধার ঙালে বাহে বাহে তোরে পেইংগা,
জোনাকহানর মিঙালহানাং জলকেলি তোর খানি চেইংগা,
হাই বুলেদে,
কাকেইহানর বাধন এহান আই খুলেদে
তোর দ্বি আতে
ঠইগ বুজে হাতে হাতে ॥

রূপা খানি আতে পেইলে করিং চানৌ,
মুঙে দিয়া জনমহানৌ,
নেয়্যাও থাক ধনৌ মানৌ মোরকা খানি,
পানির টাটি বাতর বকে হাববি জানি ।
তি মুঙে অ বাতগি নুয়া
মুখ শুদনর পানা গুয়া ।
হাই বুলেদে,
মধু বুজক তিল ফুলেদে ।
তোর দ্বি আতে
ঠইগ বুজে হাতে হাতে ॥

রঙ

খেরর গজে মাটি গছিয়া থছিল দুঃখহানাং
রঙ গছে দিলতা কুংগই !
স্বর্গ মর্তা রসাতলে ঔ রঙর ধারাহান
অনন্তর ধারাহানাং তিলছে ।

হোলি

স্বাক্ষর ইন্ড

ফিরাল এহান পুড়ের ঙালে তোরে খানি চেইংতা,
ফংকরেছি মিকুপ আহান লপুক এগং পেইংতা
খৌরাঙ আহান লেইরাপাহান আছিল কিংতাউ নেয়া,
লাগেছে এ ঙি এগল তারৌ সাজা দেয়া ।
হরি বলার চৌলগি থছু দ্বিয় আতে
কিতার কাতে
নেনার আতহান নাইলতা !
গুবাটি ফুল উম নাপেয়া থাইলতা ।
আহির পানি জোনাকহানাং অলছে তোরে শাতহান ।
আতহান !
কেথক করের আবীর খানি দেনে কুমেইহানাং,
আহি এ থম সালছেতা নুয়া লাজহান চানাং ।
আঙুলিগং বেরাছিলে মাক্রা মাচুর নারগ
সকছিলগা দূরেইর পারগ ।
ফিরালহানাং আছিল আধার
গুরেছিলতা পারগ কাদার ।
মুকেছে তোরে জুরাগরমাউ আছিল ঙিগ
হার নাপেয়া কিহান কিগ
লুকেয়াহে থইলু,
তি বুনেছং ফিরালহানর ছালিগ মি অইলু ।

মাতেদে

আমি পানিহানর কাদাং গেছিলাংগা দিন উহান পানিহান গুমে
আছিল । হজাক করানি বানাপেয়া না হিনেইলাং আমি । আমার অটে আছিল
মেয়েক এতারেউ না হিনাদেছি । দুঃখহানরে তিলাঞ্জলি দেনা নুয়ারলাং ।

আমার আতে কুংগই তুলে দেছে এরে ত্রিতাপ । আমি শুদ্ধ
নাছি । ঔহানে আমি কিংতাউ কাংকরে নুয়ারিয়ার । হে শালপ্রাংশু হাগহান,
তোরে জাঙহানর তলে মরানিরকা জরম অছি পকজকর জনম এহানল আমি
কিহান করতাঙ, খানিক করে মাতে দে ।

পাশা খেলা

শ্রীমতী কল্যাণী

আজি মোরতা শব্দর লগে পাশা খেলা ।

কবি আগর বুকগর আড়ল হংকরেছি পাশাগি

এবাকাউ ডুক ডুক করেব ।

শব্দর মেইথঙহান জুয়াড়িগর সাদে ! অটগৎ মুকসিহান,

আহিগি ইং বার নিষ্ঠুর ! মেইথঙহানর কাদা আগ এসিডে পুড়ে

ধূতরাষ্ট্র, ভীষ্ম, দ্রোণ গাছির প্লাস্টার অব প্যারিসর

অন্ধ মূক বার বধির মূর্তিগি চারিবেদে ।

শব্দই পাশার দানহান এরা দেনার আগে আংকরল

কিহানতে পণ থইতেই' ।

মি মাতলু-থাইনাংত চলিয়া আহেছে ঔহান ।

দ্বাদশবর্ষ বনবাস বার বছর আহান অজ্ঞাতবাস ।

ঔহানৌ পণ আহান অর থাঙ !

তিতে জনমহান বনবাসে আছংগ ।

জনম এহান অজ্ঞাতবাসে আছংগ ।

বনবাসে আছং মানুষরতাতে নুয়া করে কিতার বনবাস !

অজ্ঞাতবাসে আছং মানুষরতাতে নুয়া করে কিতার অজ্ঞাতবাস !

- ঠইগরে পণ থইলেতে কিতা বুলর !

- তোর গারিগৎ ঠইগ নেই ! তোরতা কিংতাউ নেই ।

কারর নিংশা ঔহানৌ উদারিহান

হনিয়া গাটহানে কাদানি অকরল । গাছর ডেঙেৎত

পাতাহানি জঙিয়া পড়িল ।

বেলি এহান লাজহানে কালাগ অইল ।

জোনাক তেরা হাগহানাং না নিকুলতাই বুলিয়া লেপইলা ।

মোর হকগরে আর বিসারেয়া নাপাউরি । আহির পানিসিটাও ।

বুকগর দুঃখহান হিলর লুমপাকগর সাদে ভরি অইল ।

চারিবেদে অনন্ত আধার আহানর পরাজিত শূন্যতা আহান শিচিল

বাসেয়া থাইল মোরকা বুলিয়া ।

চরণ আহান

চরণ আহান আছিল পাউরি নূপুর জঙেছেতা,
বিবুলা এ আহি দ্বিগি উনাতে নাছেতা ।
ঋণ হানি মোর হুজানি নার,
মিঙাল এহান ইঙে বারার
মেয়েকগিল কিতা করতু কথাহানতে নেয়া !
দিতৌ মিতে বুলেছিলু তোরাংত হে পেয়া ।

তলফুতির ললগ তিতে দ্বিগ কলকরেছৎ
চরণহানর থমকহানাং ঠই হাতোগি দেছৎ ।
জনম এহান এদিন হাবি কারাং লালছিলতা,
বিসারেয়া নাপাউরি মি খৌনু বুজে পিলতা ।

য়ারিতে কই, পরিতে কই, গবে কিয়া নেইতা !
কলকরানির আতদ্বিয়হান আকখুরুমতে দেইতা ।
জুরার ফুলগ জঙেছিলতা আরাক আধারহানাং
দূরেইহানাং নাউ গেছুগা ঔগরে মি পানাং ।
মাগিলতা নেই, দিলতাউ নেই, পথগ চেয়া আছ
চরণহানর নূপুর ঔতা এবুজো নাউ পাছ ।

উপমা

উপমা তি কিতা খালকরুরি,
না নাছতারা ময়ূরা ময়ূরী !
কুরাং জঙের তালর অলঙ্কার
শব্দ অর্থ চা খেয়য়া থার ।
হেকগ কুরাং মাঙছেগা নেই
পারেঙহানি বৌয়ে বাহের চেই ।

এহান কিহান

১৯৩৬

পৌহান নেগা হকানা পাতাহান, খুয়াছু চুল এতা নেগা পানা.তাংখা
ফিজ্জহান নেগা দুকগাচ উঠেছে ভিটাগ ।
দানর সেনাপুলগ নেগা হে মাদানর পরহান ।
খৌরাঙহানর হেকগ নেইগা কাটারেই জারি ।
তর্পণর জলসিটা নেগা পাতালহানর লেঙৌর সেকতাইগ ।
যেগই যেতা পাররাই নিয়া বেলেইগা ।

মি আনেছিলুতা নিবেছে ঝিগর আঙাৱাগর বকহান ।
লেইরা আগর ফলি ধরেছে আহি থম,
কান্ধাল আগর পুছেছে আতর রেখাহানি,
থুক করানি আহান, খুমকরানি নেই আংকরানি আহান,
নিংসিং গাটর পারে বাসেয়া আছে ডুমুর জার,
রাসে না হমাছে মাথাঙ আগই পথে পাছিলি ককনাম আহান ।

হাবিরেউ হাবিতা দিয়া যানা মনাউরি ।
যেগরাংত যেতা পাছু । হাবির ঋণ হজানি মনাউরি ।
মোরে না আংকরিয়, মি ইচুদিন থায়াও
কিংতাউ হারনাপাছু ।

পথ এগরে আংকরিয়া চেইলু । পাহিয়ার জমহান,
মাঠার কানিগ, জারর পরর বরনহান,
থম থম করেছে বিয়ানহান,
কলকরিয়া থছু বেলিটিকর খরানহান,
স্বর্গ মর্তার ধুমাগ,
ডাকর পুংললহান,
চৈত্র সংক্রান্তির লিকলগি,
ববেয়ে নেছেগা দাতগি,
আকগয়ো না খুমকরলা । মাতে নুয়ারলা
এহান কিহান ।

ঠাইগ দিয়া

নাহকী নাহকী

ঠাইগ দিয়া বানাপেইলু অ বরিষার ফুলগ,
কিয়া কাদৌরিতা মাতনে এরা দিয়া চুলগ ।
হুয়ে খারগা ফেন ধনুকহান লেইসৌয়ে ঙালহানি
নুংশিহানে নেরগা আয়া ডকর আহির পানি ।
তিঙকরেছু গিল্লাগিয়ো মাত নেয়ছে দিনহান,
কিসাদেতে হারপুয়ানি আগই আগর হিনহান ।

থঙ আহানর তলে জোনাক

হপনহানর থঙ আহানর তলে জোনাক,
চেয়া আছে মারুপ নেই এ ইমপানিহান,
কুরাং যারগা চুলগাছি তি ডিগল অয়া !
তুলতুলাছে রাতি তোরে ।
কলা দিতৌ, মধুর দিতৌ,
খানি বাসা, আশাহান মোর নাউ থুঙছে ।
আহির গজে পাহিয়াগ বয়া আছে ।
মনহান তি দেহেছতা দুহান মাতৌ !
মোর হুদিগৎ হ বুজেছে, জনমহানর ঋণ হুজেছে ।
থঙ আহানর তলে জোনাক, দ্বিয় পারর ছেয়ার বনে
ফুল শাতছে লাজে ডরে, ইমপানিহান কারে বাসার !
গৎ উহানর কঙালা আত অন্ধ আছে মিঙালহানাৎ ।
মিঙাল এহান যারগা চানে নাগইগদে,
পথ নাচিনের ফুলর গতে ।
আই হমাজি, আইনে গিদেই,
আমি তারে পথ দেহাদিক,
আই লালয়া চুলর থঙহান ।
সেনাপুলগ বুজে আনিছ
আমি দ্বিগির সালে আরাক ইমপানিহান ।

বিবুলাগ অউরি

পাগালাগই কিতা কবের আকখুলাগই বয়া
গইগ অয়া ।

নাকবেরতা গরে বানা ।

গারি এগৎ অকবেরছিল খৌরাঙ আহান মাঝাঙ কানা ।

আছিল নুয়া ফিয়ম মাঠ

ঠইগ কুজু বানার আঠ

কিগই উতা করলা ইতু ।

ছেয়াগতে দূবেই আছে, যারি এহান কারাং দিতু ।

পেপুরাগি । ডিমল তুমি সালছতা কুরাং বানাং ?

মিঙে আছু পারেঙ হনাং ।

আমার বেক পেপুরাগ ! মাত নেয়াছি তিরো মিয়ো,

আকতা অছি দ্বিগিয়ো ।

এবে ডাঙর হাগ এহানর তলে বয়া

বইদ বরনে দেবতা ধয়া

আমি দ্বিগির কথাহানি ।

নাউহে জানি

লাহলাদে কুরাং মাঙর

হারপানিহান নাহে নাঙর ।

আত আহানাং আহির পানি, আত আহানাং বানা,

আহি দ্বিগি বাদে দিয়া আছে কিহান কানা !

গরগ যারগা দূবেই অয়া,

মি থাইলু এপেই বয়া,

গরগ কারগ, মিতে কুংগ, কিতা মি করৌরি

কিতা নেয়ইল, কিতা থাইলতা বিবুলাগ অউরি ।

রাতি এহান

রাতি এহান বরন দিল আধারর মেইথঙে ।

বিয়ানহানর রঙে

মামখানিতে না জঙিয়া আছে,

মেঘর হাদিং গাছে ।

আসাংপাল সাঙকরিয়া ফিটা আহান দিলু

মাম উহানি আহিগিল পিলু ।

গাছর পাতাং বৌ আহেছে, নাহেছে তোৰ পৌ ।

মিঙাল হানৌ

কাৰ সালেদে হাংকই আছে আহানিহান ।

নাছে থাং মোৰ ডাহানিহান !

সুমে খাছি গুমহানো মোৰ ।

জনমহানর

মিনাই অয়া ভার বয়া হে আছু,

কামর হাদিং তোরেতে নাউ পাছু ।

চতুর্থ শান্তি

হে পিতৃপুরুষর অস্থি টুমাহানি, গাককরেদেই । ধূপর সাদে
শিলছে মরণর গংহানরকা হ্নারুপার পানিসিটা থছিলাং সেনাপুল এগরে
মাতেদেই ওঁ শান্তি । খইনাঙর পিতারেই পাতাহানি ! তুমি দেহেছ আমি
পাতাল গঙ্গাং হিনেয়া আহেছিলাং তোমারে উনা অইক বুলিয়া । কুরাং জঙিয়
পড়েছতা তুমি ! তোমারেউ মাতিয়ার ওঁ শান্তি ।

তি নায়া কুংগই আমার ঠই এগিরে চক্ষুদান করতইতা হে নীলকণ্ঠ
জনমহান । ওঁ শান্তি । ডেং পালর হাদিয়েদে পাংকালপা বেলিহানর চিকারি এগ
ইমপানি আহানর বেদে সালছে ।

আমি লাং করেছি গর এগরে ওঁ শান্তি । খড়ম হানরে ওঁ শান্তি
ছাতিগ লাঠিগ ওঁ শান্তি, চারিয় বারাদেংত পাতেছি আতহানি ওঁ শান্তি । চুচ
জিগ, তোরেউ ওঁ শান্তি বুলানি মনাউরি, মাতে নুয়ারিয়া আছুতা ।

পাগালা মিঙালে

পাগালা মিঙালে ডাহেরতা লৌ দিয়া

পথগ কইতে, কই !

ডেই ডেই হারা দেছে এরে রাগ এগ,

ডালে দেই বুজে ঠই ।

দেশান্তরীণ অইতৌ কারেল মি !

কিহান থাংক নাঙ !

ছেয়াগ কুরাং কাদিরি আকখুলিগ,

বিসারেয়া খানি চাঙ ।

গর গিরস্তি বাগে দেই, বাগেদেই ।

খেওয়ার কড়িগ আনো,

আতহান কই ? বিসারতে নেয়ছেতা ;

ছিড়েছেতা লুরি নানো ।

পাগালা মিঙালে মাতের-‘এতাতে কিতা

বাগেছে কুপাংহান,

মেইখঙহান নাদেহেছু আজি পেয়া

দিনহানো কান কান ।

দেশান্তরীণ অয়াতে কিহান কানা ।

কিতাল সালইতেই ।

টুমা টুমা অয়া গুড়াগ হপনহান ।

আহিদিয়গিয়ো নেই ।

গর গিরস্তি কুরাং কিগই জানে,

মাঙছে বিদেশহানো,

বরনে লুকাছে হাওনর পূর্ণিমা,

বিসারেয়া খানি আন ।

আহির পানি সিটা

আহির পানি সিটা
শাতছে মাম হান
কইতে মেঙশেল
হুদির ছেয়া এগ

ঠুয়ছে মেঘ এতা
এপেই এরে পারে
গোপন খুৎতলে
তোরে মি নাচিনুরি

বারউ উনা অছি
আহির পানি সিটা

করিয়া খুৎতাঙে
দিতৌ কার নাঙে !
আহির মুঙে কই,
কুরাং অর চই ॥

কিসাদে জনমর
হুদির মাচু অর ।
বিরহ আনেছৎ
পাউরি তোঁর গৎ ॥

দুগই দ্বিয়পারে ।
বুজিয়া আতে থাকে ॥

মুঙেদে হবাদিন আহিতই

মুঙেদে হবাদিন আহিতই । হিন নাপেই তিনজরার পথগ,
বাগেছে মিঙালহান, সানেছি হপনহান ।

থিঙয়া আছে দুয়ারহানর আহিথম,
লালছৎ তালহান । আলথক করেছি বার্তনহান ।
এসাদে দিন আর নাথাইতই । আমি নুঙেই অইতাঙাই
হে লাজপাছৎ বরনহান, নিবেছৎ দসিগর ঙালহান ।

কুমারী শৌয়ে হিনেয়া আনতাই সেঙ পানির সাদে
ঙালইতই আমার উঠান গর ।
আমি পুলকরতাঙাই জোনাকর মিঙালহানাং হারৌহান
চৈত্রর জারল জারে কওয়াকলেইর খুপাখিচেইহানর সাদে
আমার কথা এতাউ নাছতই ।

আমি বেলেয়া আহেছি লাম উহান
ডাহেছি বরন জুরি
কার্তিকর গুম টিপার কাপক পাতা
নুঙেই নাছে ধূপর নুংশিহান
হাবি চামইতাই ।

আমার হিন দুখ নুয়ারা পানি হাবি লেমেদে না মাঙইতই ।
মুঙেদে হবাদিন আহিতই
বাসেয়া থাক কাটা সপা
যেসাদৌ পৌ পেইতেই, সই নেই ।

দুঃখ পাছে

দুঃখ পাছে চুয়েইহানর তিলগ কিয়া,
ঠেমকরানি কিতা দিয়া !
ফুলর গংহান পুড়িল ঝিগং
বানা নুংশি থইলু কিগং,
কুরৌ আহান যারৌ এতা দিতউতা কার নাঙে !
হপনহানাং ফুলগ আছিল কাটাগি টেইপাঙে ।

মিঙালসেনার মেইথঙে চেই আহির পানি
কিতালতে চামকরানি ।
বর্তিগ থাক অয়া হজাক
গমগমনেই আকগদে থাক ।
গাটহান তি কুরাং আছং
বাসেয়াতে কিহান পাছং ।

আজি ঠইগ মেঘলা অছে
বানা নুংশির পানিহানর খানি গজে ।
কুরৌ আহান যারৌ এতা দিলুতা তোর নাঙে,
হপনহানাং ফুলগ শাতর কাটাগি টেইপাঙে ।

আধারহানর আত ধরিয়া কুংগ আহেছিলতা,
দিয়া দিলু তারে মিতে যেতা দেনার দিলতা ।
চুয়েইহানর তিলগ তোরে কিতা দেনা,
তোর সালেদে কিতা থইতু মিঙালসেনা !
হিনেয়া আই মুকসিহানাং তিলগ তিতে ;
বানাহানর ফিজেং এহান পিদা দিতে
দেহিং তোরে
হবা করে ।
হপনহানর ফুলগ জঙিল কাটা গিহে আছে
হুদিগংত কাড়িয়া মি দিংনে বাছে বাছে ॥

তুমি থাই

হেমপ্রভাবতী খৌরাঙহান, দারাছি থাংজাংহান মালছং দৌ জিলকানিহান, জঙেছং সিংগারেইগর শাতহান, মি নাথাইতৌ দিনেউ তুমি থায়োক । কথা দেই, হাই বুলো, থাইতাঙাই বুলিয়া । হে আকাশ-গঙ্গার সেঙ ধারাহান, খেলমাচির চমকিগি, রাতিকার বরনর ফুটাং বিয়ানর ফিরাল রঙর ঙালহান, যাবেকনির তপ্তা আশ্লেষহান, তুমি থাই চিরজনমরকা এরে পৃথিবীর দুঃখর সেলকম সিটা সকয়া ।

হে গর বিসারার পাগালাগ, চন্দনবনর সুরভিহানর নিংশিংহান, বট খইনাঙর মাঠিয়াল লেংকরেছি ছেয়াগ, তুমিউ মোর লগে বেলা দিয়া নাযেয়গা । হে নিঙর ঠুনিংসাহান, পৃথিবী এহানর পল্লেইহান অছং বসন্তর রঙহান, বরেই ফুলর নাসিকাগ, ইচুদিন মি আছিলু আরো তুমিও আছিলাই মোরাং চেপয়া ।

আজি যানার পরে পানিহানাং খেলেয়া আছিল জোনাকর মিঙালহানে আতহানাং দরিয়া মাতল মোরে এরা দিয়া কুরাং যারগাতা আকখুলাগই । আন্দিয়া খঙর পাহিয়াগ যুগযুগান্ত লালয়া মাতল মিতে কারেল থাইতৌ । পুরি জেলাগর ফিজ়েংহানর অটগিয়ে মাতল-মোরেতে কুংগই লেইচন্দনল ঙককরতই ।

অষ্টপ্রহরহান, পৌষসংক্রান্তির ইঙহান, মানু নেই ভিটাগ, তুমি থাই ।

তোমারেউ নেনা মনাউরি । তোমারে বেলেয়া যানা নুয়ারিয়া অছুতা । মি গেলেগা তোমারে কুংগই চেইতই, কুংগই চেপকরতইতা ! অনন্ত শয্যাহানর বিশাল মাঠাহান অছং লপুকগ, কুংগই তোরাং গিয়া জিরানি আহান মাগতইতা !

ওতাউ তোমারে থয়া যাউরিগা । তুমি আরাক আগরে বাসেয়া থাই । মোর আহিগিল, মোর বানাহানল, মোর দুঃখহানল তোমারে চেইবতা ।

দুঃখরে আর

দুঃখরে আর দুঃখ নাদি ছেয়ার বনহান,

নঙেই রাতি পুড়ের মনহান ।

মলখুম এহান হজাক অছে তোর সালেদে,

আই ডালেদে

চানা আহান আহির পুয়াং ।

আধারহানে ডাহেরতা নাই বয়া দুয়াং ।

লাংকরেছি আত দ্বিয়হান

কুরাঙ আছে খানি তি আন ।

খানিক করে ইমপানি অ

খানিক করে ইমপানি অ গরচেরোগ
ইমপানি অই ফুলর কুড়ি, নীলুয়া হাগ
টেঙারাগর হিলগি খানি ।
কইতে আঙ্জি গরর মানু !
মুখালহানর হৌগদে কুন আহি থমে
মরগহানর বার্তন আহান ।

পিচুমগিরমা কি এলাহান
হেকগ আছে ডিগল পথগ ।
বসন্ত তোর ফাগি ফারাং কুরাং থছৎ
গারিগরমা মককরেছৎ যানার পরহান ।
বরণ ডাহো ইমা ইন্দল, কই সরারেল মাদইতে কই ।
হনার কেইরাক লামের চানে রসাতলে ।
বরন আহান পাহরিয়া মরগহানাৎ ।

ভিটাগরমা বইলা মাচি থাচির দিনে ।
লালছেতা যাত্রা এগ
উঠানহানৌ নাউ সেঙছে ।
পারা এহান কুরাং থনা ।

আহৌ আটহান গাট লালয়া
সালছে চেই এ মাম এহান ।
মুর নঙাছে ডকহান অয়া ।

খানিক করে ইমপানি অই আসাংপাহান
কাদানিহান হনে বেলেইক হবা করে ।

বানা আহান

বানা আহান বুজে থছু তাপু এগৎ এগ কিগ,
কুন বরিষার কেতকীগ ।

হৃদির কোণর দুঃখহানর মুকসি অয়া
আধারহানাৎ আছিল বয়া
চিনলু আজি নুয়া করে
মাদান পরে ।

তিয়ে মিয়ে যারি আহান দিলতা আছিল,
ইহু দিনতে সময় নাছিল ।
সাঙ নাছিলে জনম এহান, সাঙ নাছিলে দুঃখ তিতে
চেয়া যাইতে পথ এগিদে ।

তোরাং হে নাই আছিল পাউরি !
মি উগদে নাহে চাউরি
জিংতা অনির হারৌ পিয়ম, কুরৌহানাৎ যারৌ সিটা
কারাং আছিল হম দেনারতা মলাগি কিতা !
তাপু এগৎ আছিল জলা,
নুংশি নুঙেই আহান তলা ।
কেতকীগ বাসেয়া তি আছৎতাতে মোর সালেদে
মাদানহানাৎ নুংশি খানি আয় ডালেদে ।

পলাঙগ

কথা আহান দিতৌ বুলেছিলে হনার পলাং আগৎ ।
য়ারি আহান দিতৌ বুলেছিলে কাদের পথগরে ।
রাতি নঙেই আঙেইহান করিয়া জোনাকর মিঙালহান
গাটর পারগৎ বয়া থাইতে
মি তোরকা বাসেয়া আছিল পলাঙগর কাদাৎ ।
হাদি হাদিৎ পথেদে নিকুলিয়া তোরে চেইলু ।
আঙেইহান পথে পড়িয়া আছিল উনি
মিঙালহানর জাঙহান পানিয়ে ধ-দেছিল উনি ।
মোরতা দেহানি নাইল । হুদালা হনার পলাংগৎ
নাপাছু ওতা যমকরিয়া বাসেয়া থাইলু জনমহান ।

হপনহান

হপনহানর আঙুলিগি লেহাও জারির তলে মরে যারগা ।
লাংটিয়া পাল আহান ফরদিভারা ।
খানি দূরেইৎ যমদূতগ সিগারেট আগ লাগেয়া ।
বাসেয়া আছে । ঠইগল যিতইগা ।
লাংটিয়ারকা খদিতই খলগ ।
রইদ পড়তই, বরন পড়তই
জোনাকহানে মতছে মিঙাল সিটা সিটা
ফামহান সেঙকরিয়া লালয়া যিতইগা ॥
আধারহানাৎ জিনজিনিগিয়ে ফরদিয়া বিসারতাই
হুতুমেউ এপেই আছিল থাঙ !

শৌ কাদলে রাতি মালক লকেয়ে
আঙুলি উগির য়ারি দিয়া ঠেমকরতাই ।
আর কেঙগ আহিল নাবুলিয়া
— ওরে হপনহানে কেকার, ওরে উঠিয়া বহিল,
ওরে আহের তোর আহিগিৎ হমানিরকা ।
— ইয়া, কিহানতে অইতই ।
— তিরো হপন দেখতেই । ওহানল খেলানি মনেইতেই ।
খেলতে খেলতে হপনহান মরতই ।
ওহান বার সিংগারেই জারির তলে গাতেইতাই ।
ওহান বার আকদিন আরাক আগর
আহির পুয়াগৎ হমেইতই ।

আকতা তোরে

আকতা তোরে দিলুতা মি নাদেছুতাই আকতা,
খালকরিয়া তোর মনহানে দুঃখ পানি নাকতা ।
মায়াহানর মিঙাল খানি লককরেছু মিতে ,
পথগ কুরাং পড়িল বার মিঙাল গাঠি দিতে ।
মিঙালহানৌ মামইল গাঠিৎ, মাঙইলতা নাই পথগৌ
মুকানিহান নারতা চানে বেড়াছে এ লতগৌ ।
তোরে দেনার হুদালা আত করলু উবুরিগ,
নাউ দেখলু আধারহানাৎ জঙিলতা থাঙ কিগ ।
নেই আকতা তোরে দিলু, নেই আকতা মোরতা
মাত নেয়ছে খুৎতল এহান কতি পাঙগ অরতা ।

নাপাউরি

নিমর ফুলর নুংশিহানাং চেপয়া আছিল আধারহান ।
গাট আহানর পারগৎ নিংশিংহান ।
পহুরিগর হেইলাংচাকে নাপছে ইং আহান ।
মোর আতহানাং হিয়র দিয়া গুমজেছিল লাজ নেই হপনহান ।

হাবিরৌ খানি খানি চিনৌরি । ইমে শাতহানি পাহরেছুতা না ।
নাঙহানিতে নিংশিং অউরি ।

পিচুমগির হাদিং নুংশিহান ।
মাতাম ফাছে ইঙেলেই
বরনে তিঙেছে খৌরাঙহান গারিগৎ বাসেয়া আছিল ।
বর দিয়ৌরি, খৌরাঙহান পুঙ্কি পালয়া থাক ।

দিনহানর নাঙ থছিলুতা কুসুম,
রাতিহানর নাঙহান থামবাল ।
গুমহানর নাঙ সিদ্ধারেই ।
মিঙালর জাপ চন্দন পিদেছে হাগ এহানর তলে
আজিতে আকগরৌ বিসারেয়া নাপাউরি ।

সাঙ নাছি

গাটহানর গজে নঙেছে মেঘ এতারে চাকুরা নেই ।
কামে গইগ অছি মানু ।
গাট এহানর আহিগি জিপে আহের,
মেঘর অটগৎ স্বিগ ।
আধারহানে মহরিহান অয়া জাপদে দিতই ।
মানু সাঙ নাছি । নুয়ারাপানি, শৌ কাদানি, য়ারি পরি ।
ছবি এহান দিয়পারেদে বৌহানাং বাহিয়া য়ারগা ।
আকগরৌ সকো নুয়ারের ।

কবি ল্যাংসটন হিউজের

কবি ল্যাংসটন হিউজ, মোর মেঙশেলহান !

আমার হপন আহান বাগিয়া চুরমার অছে পাংকালর আতে ।

মি এপেই বয়া তোর হার্নেমর কবিতাহান পাকরুরি ।

তোর দুঃখ ঔহানে মোরে দুঃখহান হিকার ।

তোর অভিমান ঔহানে মোরেউ অভিমান হিকার ।

মোর মাতহানর গজেদে, দুঃখর গজেদে

অভিমানর গজেদে, হার্নোর গজেদে, কুমেইর গজেদে,

বকহানর গজেদে, ডকহানর গজেদে, হকগর গজেদে,

পারা দিয়া সালছে ক্ষমতার দর্প আহান ।

কবি ল্যাংসটন হিউজ ! তিতে তোর দুঃখহানরে ফিরালহান করে
বেলিহানাৎ তুলে পারেছৎ বলী পামপলগিল ।

আমিতে মুর তুলে নুয়ারেছি ।

মোর খুলি বনক উগরে বর্বর পশুশক্তিয়ে

মালকর উরেৎত কাড়লয়া নিয়া বুকগর গজে গুলি করিয়া মারলা ।

যে বুকগৎ প্রেম আছিল, আহির পানি আছিল, আশা আছিল ।

মোর বেইবুনিরে পঙ্গু করে দিলা ।

মি রকতর হাদিৎ, মৃত্যুর হাদিৎ, বঞ্চনার হাদিৎ, অপমানর হাদিৎ

ইকরুরি কবিতা এহান পাকরেকুরা নেই ।

কবি ল্যাংসটন হিউজ, আমার ফিরাল এহান তুলানি পাংকরিয়া ।

মোর কবিতার মেয়েক কাড়লইতার ঔতারে মাতেদে

তানুর নংমেই ঔতাই মোর হপনহানরে মারে নুয়ারের ।

মোর কলমগৎত পড়ের রকত এতা

তানুর মেইথঙহানাৎ লাগেরগা ।

সল মানুরে অপমান করিয়া তানুহে অপমানিত অইতারা ।

হুমাজি গাটের পানি

হুমাজি গাটের পানি কিয়্য অক্তি

মান করেছতা থাও ?

গাছ হাবি মাময়া আছি ।

যাঠার কানিগর সারহ পার এখ ককরম সিকিয়া আছে ।

বৌহানাং হাউহান নেই ।

মেঘর হাবিং থায়া মালানর বেনিহান নিকুনানি নাকরের ।

মেইথঙহান বুলেয়া গায়্য আহতা কিয়্য !

মিতে কিতা করতু যাককনাই ।

মিতে আহিতৌহে বুলেছিলু নাই ।

নিংসিং অউরিতা জোর গারিগং নুয়া নুয়া বৌকন্ন গুলহান
ফুটিং ফুটিং বুলেয়া ।

মোর বুকগং তপ্তা নিংসাহান ।

তোর আহির পুয়াগং বর্তিগ

মোর বুকগং ছোহান করে পড়ের ।

হাগহানে মাটিহানে তোর পারাহানে মোরে বার্তন দেয় ।

মামছং মিঙালহান, জেঙছ লেউ ফুলগি

পারগং কাদিয়া আছং আসাংপাহান

হুমাজিরে মাটিয়া দিয়া বহেছং বৌহান

খানিক করে মাতে দেই, আকখুরম মেইথঙহান তুলিয়া চাক

মিতে কিতা করতু ! দিন এহানিয়ে বেড়েয়া থায়া

আহে নুয়ারেছ ! আহিতৌ বুলেছিলুগ ।

কিতা করতু ! মি লালছ ।

এজনমরকা মোরে গাককরে দেক ।

আহিগ না মামো থাইতে মেইথঙহান

আকখুরম চেইং

আকখুরম গারিগর ইংহানল

থাইল জনম এহানরে হিনা দিং

745

746

747

748

749

750

751

752

753

754

755

756

757

758

759

760

761

762

763

764

765

766

767

768

769

770

ধনঞ্জয় ৰাজকুমাৰ কবিতা প্ৰখ্যাত কবি নবকান্ত বৰুৱা গিৰকে অসমীয়াত অনুবাদ কৰেছে ।



ধনঞ্জয় ৰাজকুমাৰ বিষ্ণুপ্ৰিয়া মণিপুৰী সাহিত্যৰ আধুনিকতাৰ জনকগ । তাৰ কবিতাত
ৰোমান্টিকতা, দুঃখ হাবি বানাহানৰ সাদে ঠাইগ বুজিয়া থাৱ । বিষ্ণুপ্ৰিয়া মণিপুৰী কবিতা যদি
গাৰিগ পেয়া থাৱ, ঔহান ধনঞ্জয়ৰকা । মনহান, ঔহানৌ, ঔহানৌ তাৱকা ।

সম্পাদক : ত্ৰিপুৰা চে



খানি বাছা (হপনৰ বাবু ধনঞ্জয় ৰাজকুমাৰে)
(অংশ)

মুঙৰ অলিপুতাং তি হিচেছিলে বিৱনৰ বীজ ফৌদক আছে
ঔতাৰ কাপক তাপুং বুজিয়া, কাৰ্তিকৰ লপুক ফাৰি দিয়া
আহিতাৱা চতুৰ্দশী জোনাক মাহি ।

ডেউটিৰ মিঙালে চিনে পৱৰতা, তোৰ মাঙছে হপনহান ?

... ধনঞ্জয় আৱ ডিল নাকৰি । মালঠেপে কা

খৌৱাঙল বাসাছে তোৰ ইমাৰ আতহানান্ত ;

তাপ কৰা গুয়া চাবা বৰেয়া কুমেই চা ।

মেয়েক ডালল প্ৰেমে হমা ।

স্মৃতি কুমাৰ সিংহ



ধনঞ্জয় ৰাজকুমাৰ আমাৰ সাহিত্যত ডাঙৰ গোলা আহান - তাৰ অবিৰ্ভাবৰ লগে লগে পুৰানা
কবিৰ ধ্যান ধাৱণা... ঠাৱৰ বিন্যাস হাবি বাহিয়া গেলগা । হুন্দা এপেই হৌপেই দ্বীপ
আকেইহানৰ অস্তিত্ব বাদে । তাৰে বেৰেয়া প্ৰতিষ্ঠান আহানৰ জৰম...

বিশ্বজিৎ সিংহ



... বিষ্ণুপ্ৰিয়া মণিপুৰী কবিতা (ধনঞ্জয় ৰাজকুমাৰ ৰচিত, ভক্ত সিং - ৰ অনুবাদে) পাকৰিয়া
মুখ অইলু । এহানৰকা দ্বিতীয় ধন্যবাদ ।

বৈদ্যনাথ চক্ৰবৰ্তী (নৈহাটি)

সাহিত্য, নবপৰ্যায় - ৪৭